



**ԱՄԵՆԱՅՆ ՀԱՅՈՑ ՎԵՀԱՓՈՒ ՀԱՅՐԱՊԵՏԻ ԿՈՆԴԱԿԸ
ԱՄԵՐԻԿԱՅԻ ՄԻԱՑՅԱԼ ՆԱՀԱՆԳԱՅ ՀԱՅՈՑ ԵԿԵՂԵՑՈՒ
ԵՐԻՏԱՍԱՐԴԱՅ ԿԱԶՄԱԿԵՐՊՈՒԹՅԱՆ 25-ԱՄՅԱԿԻ
ԱՌԻԹՈՎ**

ՎԱԶԳԷՆ ԾԱՌԱՅ ՅԻՍՈՒՍԻ ՔՐԻՍՏՈՍԻ, ՈՂՈՐՄՈՒԹԵԱՄԲՆ
ԱՍՏՈՒԾՈՅ ԵՒ ԿԱՄՕՔՆ ԱԶԳԻՍ, ԵՊԻՍԿՈՊՈՍԱՊԵՏ ԵՒ
ԿԱԹՈՂԻԿՈՍ ԱՄԵՆԱՅՆ ՀԱՅՈՑ, ԾԱՅՐԱԳՈՅՆ ՊԱՏՐԻԱՐՔ
ՀԱՄԱԶԳԱԿԱՆ ՆԱԽԱՄԵԾԱՐ ԱԹՈՌՈՑ ԱՅՐԱՐԱՏԵԱՆ
ԱՌԱՔԵԼԱԿԱՆ ՄԱՅՐ ԵԿԵՂԵՑԻՈՅ ՍՐԲՈՅ ԿԱԹՈՒՂԻԿԷ
ԷԶՄԻԱԾՆԻ

ՔՐԻՍՏՈՍԱԻԱՆԿ ՍԻՐՈՅ ՈՂԶՈՐՅՆ ԵՒ ՕՐՀՆՈՒԹԻՒՒՆ ՀԱՅՐԱՊԵՏԱԿԱՆ
ԱՄԵՐԻԿԱՅԻ ՄԻԱՑԵԱԼ ՆԱՀԱՆԳԱՅ, ՀԱՅԱՍՏԱՆԵԱՅՑ ԵԿԵՂԵՑԻՈՅ
ԵՐԻՏԱՍԱՐԴԱՅ ԿԱԶՄԱԿԵՐՊՈՒԹԵԱՆ ՂԵԿԱՎԱՐ ՄԱՐՄԻՆԵՐՈՒՆ
ԵՒ ԲՈԼՈՐ ԱՆԴԱՄՆԵՐՈՒՆ

Աստուծոյ ողորմութեամբ, քսաննհինգ տարիներու ձեր կեանքն ու գործունէութիւնը՝ հոգևոր-բարոյական բարձունք մը հանդիսացաւ ամերիկահայոց պատմութեան մէջ, արժանի Մեր գնահատանքին և օրհնութեան:

Զեր կազմակերպութիւնը, թեմակալ առաջնորդներու և հոգևոր հովիւներու հայրական ղեկավարութեան ներքև քառորդ դար շարունակ, ամերիկահայ երիտասարդութեան արտին մէջ աշխատեցաւ վստ պահել Քրիստոսի Անտարանի լոյսը, այնպէս հարազատ ու այնպէս պայծառ ինչպէս ան ճառագայթեց մեր նախնեաց արտերուն մէջ, սերունդէ սերունդ, և պատմութեանը մէջ մեր ազգին:

Հայ ժողովուրդի քրիստոնէութիւնը, ոգեկան ուրոյն և վաւերական փորձառութիւններէն մին կը հանդիսանայ քրիստոնէայ աշխարհին մէջ: Աւելի քան տասնակէց դարեր, հայ ժողովուրդն ու եկեղեցին, ժամանակներու յարա-

շարժ պայմաններու և յանախ ահարկու փոթորիկներու ընդմէջէն անցնելով, անաղարտ ու անփոփոխ պահպանած են ս. Թաղէնս և ս. Բարթողիմէոս առաքելներէն, սուրբ Գրիգոր Լուսատրիչէն և մեր եկեղեցոյ երանելի սուրբերէն իրենց կտակուած կրօնական հաստքը, դասանալքը և բարոյական ու մշակութային արժէքները: Այս բոլորը, այսօր մեզի ամենուս համար, կը հանդիսանա ոգեկան անկորնչելի ազգային ժառանգութիւն մը, որ ոչ միայն քրիստոնէական ոգեկանութեան լուսաւոր կոթող մըն է պատմութեան բեմին վրայ, և ոչ միայն կը բնորոշէ հայ ժողովուրդի հոգեկան դիմագծութիւնը և անոր առաքելութիւնը անցեալի մէջ, այլ այդ ժառանգութիւնը կը մնայ նաև մեր օրերուն և գալիք բոլոր ժամանակներուն համար, ամենալաւերական վէմը մեր հոգևոր-բարոյական կեանքին և ամենակենսատու աղբիւրը նոր, ստեղծարար իրագործումներու:

Այդ ժառանգութիւնը գերագոյն գրասականն է մեր ազգային ներկայ ու ապագայ գոյատևման ու առաքելութեան: Այդ ժառանգութեամբ է որ մեր ժողովուրդը իր ուխտը կը քած է երկնքի հետ, յաիտենականութեան հետ:

Աշխարհի ու ժողովուրդներու պատմական զարգացման ընթացքին, շատ գաղափարներ, կեանքի ձևեր ու տարազներ, կը յաջորդեն իրարու, բնորոշելով տուեալ ժամանակաշրջանը, սակայն կան ոգեկան արժէքներ որոնք յաիտենական են և անփոփոխ ու ամէն ժամանակաշրջան, այնքան արժէք կը ներկայացնէ պատմութեան հորիզոնին վրայ, ինչքան կը կարողանայ, նոր համադրումով և նոր ճառագայթումով, այժմէականացնել յաիտենականը:

Եւ ամէն ժամանակաշրջան, կամ ամէն ժողովուրդ չէ որ կը յաջողի այդ կատարին հասնիլ: Երբեմն ժամանակը կ'անցնի անբովանդակ ու աղքատ, երբեմն նուցիսկ այլասերումի հասնելու աստիճան: Այդ կը պատահի ոգեկան սուլի ժամանակաշրջաններուն, երբ մարդիկ նորոյթը կը շփոթեն յառաջդիմութեան հետ, շատախօսութիւնը, գիտութեան հետ, անկարգութիւնը՝ յեղափոխութեան հետ:

Մեր պարտականութիւնն է պատուէր տալ ձեզի, սիրելի երիտասարդներ, որ ձեր սիրտն ու միտքը բանաք յաիտենական ճշմարտութիւններուն և մնալուն արժէքներուն, որոնք աղբիւրներն են՝ Քրիստոսի Աւետարանը, մեր սուրբ եկեղեցոյ ժառանգութիւնը և մեր ժողովուրդի ազգային մշակոյթի գանձարանը:

Քրիստոս՝ տևական յեղափոխութիւնն է մարդու կեանքին ու պատմութեան:

Հայաստանեայց առաքելական եկեղեցին վէմն է մեր քրիստոնէական հաստքին իր աստուածակառոյց կեդրոն՝ սուրբ Էջմիածնով:

Հայ ժողովուրդի մշակութային ժառանգութիւնը խորապէս ու պայծառապէս քրիստոնէական է, ազգային ու համամարդկային միաժամանակ:

Ահա այն հիմքերու վրայ ամուր ու անսասան կանգնած պշխարհին դիմաց, հայ քրիստոնէայ երիտասարդը ճակատաբաց պէտք է ապրի մեր օրերու կեանքը, իր բնակած երկրի արդիական պայմաններուն մէջ, առանց հեռու կամ մեկուսացած մնալու մեր ժամանակները յուզող կացութիւններէն ու հարցերէն, զանոնք հասկնալով ու դատելով և անոնց հանդէպ գործօն կերպով իր վերաբերումը ճշտելով, յաիտենական արժէքներու լոյսին ներքև:

«Սիրելիք, ոչ եթէ նոր ինչ պատուիրան գրեմ ձեզ, այլ զհին պատուիրանն զոր ի սկզբանէ ունէիք, և հին պատուիրան՝ բանն է զոր լուարուք: Դարձեալ նոր պատուիրան գրեմ ձեզ՝ որ է ճշմարտի ի նմա և ի ձեզ, զի խաւարն անցանէ, և լոյսն ճշմարիտ արդէն իսկ երևի» (Ա Յովն. Բ 7—8):

Այսօր. ձեր կազմակերպության կեանքի աչա հանդիսատր հանգրուանին, Մենք՝ ձեր Հայրապետը և ձեր հոգևոր Հաշորը, սուրբ Էջմիածնէն, անհուն սիրով ու կարօտով, ձեր բարեջան առաջնորդ գեր. տ. Թորգոմ արքեպիսկոպոսի միջնորդութեամբ, ձեզի բոլորիդ կը բերենք Մեր ողջոյնը և օրհնութիւնը, հայցելով ձեզի՝ օգնականութիւնը Աստուծոյ և շնորհները սուրբ Հոգոյն, որպէսզի՝ քաջատողջ ապրիք և գօրանաք հոգւով ու մարմնով, որպէսզի ձեր կեանքը վարէք ու գործէք՝ ձեր հայեացքները սնեռած յաիտեանական ճշմարտութիւններուն և արժէքներուն, որպէսզի մնաք արժանատր գաւակները ձեր հայրերուն, միշտ ամուր կանգնած հայ ազգին ոգեկանութեան բարձունքներուն վրայ:

Դուք մեր ուրախութիւնն էք, դուք մեր լոյսն էք, դուք մեր ապագան էք, դուք մեր պարծանքն էք:

«Ունկնդիր լերուք առաջնորդաց ձերոց, և հպատակ կացէք նոցա, զի նոքա տքնին վասն ոգոց ձերոց՝ որպէս թէ համարս տալոց իցեն ընդ ձեր» (Եբր. ԺԳ 17). ամէն:

Գաւգիտե Թ

**ԾԱՅՐԱԳՈՅՆ ՊԱՏՐԻԱՐԷ ԵՒ ԿԱԹՈՂԻԿՈՍ
ԱՄԵՆԱՅՆ ՀԱՅՈՑ**

Տուա կոնդակս ի 17-ն յունիսի
1971 փրկչական ամի,
և ի տումարիս հալոց ՌՆԻ,
ի մայրավանս սրբոյ Էջմիածնի
ՀՄՐ. 708

